

11. maj

**Suliffeerunnermi ikiorsiissutinik ullut 14-kkaarlugit tunniunneqartartunik pisartagaqartut, ulluni suliffiusuni tulleriinni marlunni pisartakkaminnik ilanngaanneqartarunnaarnissaat siunertaralugu, Naalackersuisut Ukiakkut Ataatsimiinnermi 2017-imi, Suliffeerunnermi ikiorsiissutit pillugit inatsisartut inatsisaannut nr. 2, 15. maj 2014-imeersummut, allannguutissamik siunnersuuteqaqquneqarnissaannik aalajangiiffigisassatut siunnersuut.** (Inatsisartunut ilaasortaq Agathe Fontain, Inuit Ataqtigiit)

Siullermi oqaluuserisassatut siunnersuummut Agathe Fontain (IA) qujanaq.

Siumumiit sulinerup akilersinnaasariaqarnera pingaartitaraarput, taamaammat suliffissanik pilersitsinissamut inuussutissarsiornikkut suliniutit ingerlaartut pitsannngorsartuarnissaat pingaartitaraarput.

Siumumi anguniakkatsinni imaattumik allassimasoqarpoq:

”Inuit kikkulluunniit suliffissaaleqillutik arlaatigut pissuteqarlutik ingerlariaqqinngitsoortartut sulilerteqqinnissaat siunertaralugu kaammattorneqartarnissaat piaartumik suliniutigineqassaaq.”

Siumumiit pingaartipparput inuk nammineersinnaasusasoq taamaaliornikkut anguniarlugu sulisartuusut pitsaasumik naligiimmik atugassaqartitseqataallutik kivitseqataasinnaanerat, tamannami nukiummat annerpaaq inuiaqatigiinnut tunniunneqarsinnaasoq.

Taamaammat siunnersuuteqartoq isumaqartigaarput inuit sapinngisamik tamarmik ullaat tamaasa suliaasaqarnissamik naatsorsuutigisaqartariaqartut sulerusussuseqarluni inuuneqarnissat pingaaruteqaqimmat.

Taamaattorli Siumumiit maluginiarparput Inatsisissatut siunnersuutip oqariartuutaa ullumikkut Suliffeerunnermi ikiorsiissutit pillugit inatsisartut inatsisaat nr. 2, 15.maj 2014-imeersumi atuutereersumi siunertarineqarmat sulileqqinnissaq tassaasoq kajungernarneraluni inissisimajuartussaq.

Ullumikkut suliffeerunnermi ikiorsiissutinik pisartagaqartoq ulluni ataasiakkaanni taartaasoqartillugu ullut pisartagaqarfiusut siaarlugit taartaaffiusuni ilaneqartarput taamaasilluni pisartagaqartoq sap. akunneri 13-ni pisartagaqarnissaanut sunniuteqartusnaanani.

Tassa piffinni ullut amerlaqataanni suliffiusuni pisartagaqarneq sivitsorneqartarpoq, tamannalu atortinneqarnissaa pingaaruteqarpoq ilisimagatsigu ulluni ataasiakkaani taartaasinnaasunik sulisussaaleqisarnerit ataavartumik pisartuummat.

Siunnersuut atuutilissappat manna ullut 14-nikkaarlugit pisartagaqarnissaagaluaq ulluni marlunni taartaasimagaani amerlaqataanni ilanngarneqartusaaapput, taamaasilluni ulluni 12-ni taamaallaat pisartagaqarsinnaalissalluni, taamaatumik piffissaq qanittumi aningaasarsiornikkut iluaqusiinnaagaluarluni kingusinnerusukkut annaasaqaataasussaammat Siumumiit

apeqquserparput. Taamaammatt pingaaruteqarpoq pineqartut qulajaarneqarnissaat siunertaralugu ataatsimiititaliamut susassaqtumut ingerlatinneqarnissaa.

Taamak Siumumiit oqaaseqarluta aalajangiiffigisassatut siunnersuutit ataatsimiititaliamut misissugassanngorlugu ingerlatipparput.

Suka K. Frederiksen

Siumut